

Ina perdetga da temps passai

La restauraziun dalla ruina dil casti da Putnengia a Dieni vegn terminada

DA HANS HUONDER / ANR

■ **Quest atun vegnan las lavurs da restauraziun dallas restonzas dil casti da Putnengia a Dieni en Val Tujetsch terminadas. Egl avegnir duei il liug survir sco attracziun turistica.**

La restauraziun ei vegnida lantschada igl onn 1999 dil Forum cultural Tujetsch. Dapi lu han exponents da quel buca mo impundiu biaras uras da lavur el project, mobein era procurau la finanziaziun. Rondond 200 000 francs ha quella restauraziun custau. «Las proxima jamnas terminein nus la sanaziun. Silsunter ein mo aunc las lavurs dil contuorn da far», di *Tarcisi Hendry* dil Forum. Las lavurs ch'ei vegnidas fatgas questa stad ein vegnidas survegladas da *Felix Nöthiger* da Pro Castellis. Quella organizaziun sefatschenta da restauraziuns da castials e segida era ella finanziaziun da quellas. Il casti da Putnengia ei vegnius erigius entuorn igl onn 1200. Ins suppona ch'el seigi staus habitaus duront rodond 350 onns, oravontut dallas famiglias da Put-



Ils mirs restonts dil casti da Putnengia a Dieni en Val Tujetsch ein vegni restaurai ils davos onns. FOTO H. HUONDER

nengia. Sin fundament da differents indezis vegn supponiu ch'ei hagi dau in incendi el casti. Schebein quel eis staus il motiv ch'ils habitonts han bandunau il baghetg ei buca clar.

Biars onns ei vegniu fatg diever dalla crappa dil casti per la construcziun d'auters mirs ella Val. Cheutras ei il baghetg ius pli e pli en decadenza. Putnengia era igl eprem casti sper il Rein. El

surveva sco center administrativ cun in ministerial. La claustra da Mustér haveva la suveranidad territoriala.

Las davosas lavurs da restauraziun

Era questa stad vegn luvrau vid la ruina dil casti da Putnengia a Dieni en Val Tujetsch

DA HANS HUONDER / ANR

■ Dapi 15 onns vegn luvrau a Dieni en Val Tujetsch vid la restauraziun dalla ruina dil casti da Putnengia. Dapresent vegn la davosa etappa exequida. Igl ei il mir d'in baghetg annex egl ost dil casti. La restauraziun, respectivamein la conservaziun dallas restonzas dil casti da Putnengia, ein vegnidas lantschadas igl onn 1999 sin iniziativa dil Forum cultural Tujetsch. El ha buca mo inziau il project, mobein era procurau la finanziaziun dalla restauraziun da quei edificis historic. Il casti da Putnengia a Dieni ha numnadamein ina liunga historia. El ei vegnius construus entuorn igl onn 1200 dalla claustra da Mustér sco sedia ministeriala.

Interessantas enconuschientschas

Il baghetg principal era circumdaus da dus sfoss, quei ch'ei unic el Grischun. Normalmein procurava in sfoss per la segirtad dils habitonts. Sin fundament da quella enconuschientscha san ins oz era daco che la part principala da habitar era buc alzada ora e contonschibla mo cun ina scala, mobein construida directamein sil grep. Ultra dil baghetg principal cumpeglia il casti era edificis secundars sco per exempel baghetgs per ils animals da casa. Ils historichers e perscrutaders dalla Val Tujetsch supponan ch'il casti seigi staus habitaus duront rodund 350 onns, oravontut dallas famiglias da Putnengia. Da quellas famiglias deriva era il prenci-avat dalla claustra da Mustér, Pieder da Putnengia. Sin fundament d'indezis ch'ei avon maun supponan ins ch'il casti seigi daventaus l'unfrenda d'in incendi. Schebein ei ha barschau leu aunc duront il temps ch'el era habitaus ni pér suenter san ins den-



Felix Nöthiger e Tarcisi Hendry (amiez seniester e dretg) prendan investa dallas lavurs da restauraziun che succedan il mument entras dus luvriers spagnols ch'ei specialisai sin quei sector.

FOTO H. HUONDER

ton buc. Il casti ei vegnius construus en in dils pli surveseivels loghens dall'entira Val Tujetsch. Aschia saveva el ademplir sia funcziun da controlla. Ins suppona ch'il baghetg eri habitaus mo la stad. Da cheu anora succedeva l'administraziun officiala dil territori tuatschin dalla claustra da Mustér.

La davosa etappa

Las lavurs da restauraziun dils fundaments e mirs che dattan aunc perdetga

dil casti ein succedidas ils davos 15 onns en pliras etappas. Dapresent vegn la davosa exequida. «Sch'ei reussescha aunc d'animar entginas uniuns e vischins da far la lavur dil contuorn quest atun savein nus terminar uonn definitivamein il project», di Tarcisi Hendry dil Forum cultural Tujetsch. Che las lavurs han cuzau aschi ditg ha differents motivs. D'ina vart ha ei dau differents gadas midadas da projectader, dall'autra vart ha ei giu num rimnar dabia daners. Quella restau-

raziun cuosta tut en tut numnadamein rodund 200 000 francs. Las lavurs che vegnan exequidas uonn cuostan persulas rodund 60 000 francs. La gronda part da quella summa sa vegnir cuvretga cun stegn finanziel dil cantun e dalla Pro Castellis. Il mument vegn ina part dils mirs d'in baghetg annex egl ost dil casti sanada e per part reconstruida. Medemamein eis ei aunc previu d'ulivar ora il terren avon la ruina dil casti. Tenor Tarcisi Hendry savessen quellas lavurs aunc furnir in

ni l'auter indezi davart il baghetg d'antruras.

Ina part dils mirs sco perdetga

Per las davosas lavurs da restauraziun eis ei reussiu al forum d'engaschar Felix Nöthiger dalla Pro Castellis sco cussegliader. Sia savida sa el metter a disposiziun per la sanaziun dils davos mirs, mo era la reconstrucziun dall'entrada ella tuor. «Igl ei impurtont che la restauraziun succedi a moda qualitativa. Mo lu fa ella senn», di Felix Nöthiger ch'ei sepperfecziunaus ils davos onns ella tecnica da restauraziun d'edificis historic. Dapi sia fundaziun igl onn 2001 s'engascha la Pro Castellis en favur da restauraziuns da castials en plirs cantuns, oravontut denton el Grischun. Sia finamira ei da segirar las restonzas e quei che po vegnir constatau architectonicamein. Denter ils castials d'antruras el Grischun dat ei parallelas en lur construcziun. Felix Nöthiger suppona ch'els vegnevan construi dalla medema glieud. Da specialists vegnan dil reminent era ils davos mirs dalla ruina da Putnengia sanai e reconstrui. Ils dus Spagnols lavuran dapi quater onns sin incarica dalla Pro Castellis. Sin fundament da material depoinu egl intern dil baghetg ha danovamein saviu vegnir constatau ch'ei sto haver barschau el casti da Putnengia. Quel consisteva da silmeins duas alzadas. Egl avegnir duei la ruina dil casti survir sco attracziun turistica ni era liug per in arranschament ni l'auter. La tuor da lenn preveda enteifer la part principala dalla ruina dil casti vegn buca realisada. «La finamira ei ussa da construir ina scala ed in plantschiu sco plattafuorma da survesta. Cheu lein nus lu era porscher informaziuns davart il casti als visitaders», di Tarcisi Hendry.